

## АРАВДУГААР БҮЛЭГ

### ХАРУУЛ ШАЛГАХ

226. Харуулыг захирдаг албан тушаалтан /105 дугаар зүйл/-аас гадна харуул гаргасан рот /салаа/-ын захирагч нар шалгах эрхтэй.

Ангийн албан тушаалтнууд, ангийн захирагчийн баталсан хуваарийн дагуу ангийн харуулыг шалгана. Шалгалтын 50-иас доошгүй хувийг шөнө гүйцэтгэнэ.

Төмөр замын өртөө, нисэх онгоцны буудлын нутаг дэвсгэрт байрласан харуул, түүнчлэн тэдгээрээр дамжин өнгөрч байгаа цэргийн ачаатай бүх тээврийн хэрэгслийн харуулыг дээр дурдсан хүмүүсээс гадна тухайн өртөө, буудлын цэргийн зохицуулагч шалгах эрхтэй.

227. Харуулыг дор дурдсан хүмүүс шалгаж болно.

227.1. ЗХЖШ / ХХЕГ, ДЦ, ОБЕГ/, Төрлийн цэргийн командлалаас томилогдсон албан тушаалтнууд;

227.2. анги, салбарт шалгах ажил удирдаж яваа дарга болон түүний даалгавраар томилогдсон албан тушаалтнууд;

227.3. анги, салбараас гарсан харуулыг тухайн цэргийн хүрээ /хотхон/-ний дарга, цэргийн зохицуулагч;

228. Шалгагчдад гарын үсэг, тэмдэг бүхий харуул шалгах нэг удаагийн эрхийн үнэмлэхийг цэргийн хүрээний дарга, цэргийн хүрээний зохицуулагч /ангийн захирагчийн нэгдүгээр орлогч, штабын дарга/ олгоно.

Нэг удаагийн эрхийн үнэмлэхэд түүнийг хэнд олгосон, ямар харуулыг хэдийд шалгахыг заана. Үнэмлэхний хугацаа дуусмагц шалгагч нь түүнийг цэргийн хүрээний зохицуулагч /ангийн штаб/-д биечлэн хураалгана.

Харуул гаргасан рот, /салаа/-ын захирагч нар өөрсдийн харуулыг шалгах эрхийн үнэмлэхгүйгээр шалгаж болно.

229. Энэ дүрмийн 227 дугаар зүйлд дурдсан бүх албан тушаалтан харуул шалгахдаа ангийн жижүүрийг дагуулж явна. Ангийн жижүүр эдгээр хүмүүсийн хувийн үнэмлэх, харуул шалгах нэг удаагийн эрхийн үнэмлэхийг урьдчилан шалгасан байна.

230. Харуул дээр дараах зүйлийг шалгана:

230.1. харуулын бэлэн байдал, бие бүрэлдэхүүний үүргээ биелүүлж байгаа байдал;

230.2. харуулын дотоод журам, зэвсэг, галт хэрэгслэлийн хадгалалт, хамгаалалт, харуулын хуудасны хөтлөлт;

230.3. харуулын байр, цэгт байвал зохих тоног төхөөрөмж, холбоо, гэрэлтүүлэг, хамгаалалт, дохиоллын болон гал унтраах багаж хэрэгслийн бүрэн байдал;

230.4. саатуулах байрны тоног төхөөрөмж, дэг журам, тэднийг саатуулах хугацаа;

231. Цагийн манаачийн үүрэг гүйцэтгэлтийг шалгаж буй офицер харуулын цэгүүдээр явахдаа харуулын дарга буюу түүний туслагч, шаардлагатай бол 1-2 зэвсэглэсэн харуулчинг дагуулж явна.

Цагийн манаачийн үүрэг гүйцэтгэлийг шалгаж буй офицер цагийн манаачид зэмлэл хүлээлгэхгүй, харин илрүүлсэн бүх дутагдлыг дагалдаж яваа албан тушаалтнуудад мэдэгдэнэ. Шалгагч нар шалгалтын дүн, өгсөн үүргээ харуулын

хуудсанд тэмдэглэнэ.

Цагийн манаачийн үүрэг гүйцэтгэлийг шалгах үед харуулын дарга /түүний туслагч/ дагуулж яваа харуулчнаараа байгууламж /цэг/-ийн хяналтыг гүйцэтгүүлнэ.

232. Цагийн манаачийн үүрэг гүйцэтгэлийг шалгахдаа цэгт нууцаар ойртох, цагийн манаачийн зэвсгийг авахаар оролдохыг хатуу хориглоно.

233. Харуул гаргасан анги, салбарын захирагч буусан харуулын бүрэлдэхүүнтэй дүн гаргаж, заагдсан дутагдлыг засах талаар авсан арга хэмжээгээ харуулын хуудсанд бичиж, хуудсыг цэргийн хүрээний зохицуулагч /ангийн захирагчийн нэгдүгээр орлогч, штабын дарга/-д 2 хоногийн дотор буцааж өгнө.

234. Хамгаалалтын болон галын дохиоллын техник хэрэгслийн хянах самбарыг харуулын даргын өрөөнд байрлуулна.

235. Цагийн манаачаас дохиоллын техник хэрэгслээр дохио өгсөн үед харуулын дарга цагийн байдлыг тодотгох зорилгоор манаа халагчийг суугаа ээлжийн харуулчдын хамт явуулж, энэ тухай ангийн жижүүрт яаралтай илтгэнэ.

Бие бүрэлдэхүүнд галын дохиоллын техник хэрэгслээр дохио өгсөн үед байдлыг шуурхай тодотгоод гал түймэр гарсан бол унтраах арга хэмжээ авна.

236. Харуулын дарга хамгаалалтын болон галын дохиоллын техник хэрэгсэл эвдэрсэн үед ангийн жижүүрт илтгэж, ажиллах зааврын дагуу байгууламж /цэг/-ийн хамгаалалтыг хүч нэмэгдүүлнэ.